

Txirritola

ARAMAIO / Barikua / 2003ko urtarrilaren 10a / 48. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Herriko mapa toponimikoa aurkeztuko dute


UBANE MADERA

Eguenean, hilak 16, aurkeztuko dute Aramaioko Mapa Toponimikoa, 18:30ean, kultura etxean. Euskaltzaindiko eta Udaleko ordezkariak izango dira ekitaldian, besteak beste.

Hizkuntzaren normalizazioan toponimiak duen garrantziarekin jabetuta, herriko toponimok batu, normalizatu eta herriko mapan kokatzeko beharra ikusi zuen Aramaioko Udaleko Euskara batzordeak. Horrela, herriko mapa osatzea erabaki zuten, Euskaltzaindiaren eta Eusko Jaurlaritzaren laguntzarekin. Pentsatu eta egin. 2001ean ekin zioten lanari eta 2002an Euskaltzaindiaren oniritzia jaso zuen mapak.

MILA TOPONIMO BAINO GEHIAGO

Mapa horrek 1.200 toponimotik gora jasotzen ditu. Tartean, auzoen, baserrien, erreken, bideen, basoen... izenak ageri dira. Gaur egungo ahozko erabilera eta dokumentu zaharretako datuak hartu dituzte kontuan lekuen eta



ROSA MONDRAGON

Euskara batzordeburua, Amaia Aspe, mapa toponimikoarekin.

gauzen izenak zehazteko orduan. Hori guztia, jakina, Euskaltzaindiak ezarritako arauetara egokitu-tuta.

Gero, mapa hori Aramaioko etxe guztietara bidali zuen Udalak joan den abenduan, eta, esan

bezala, datorren egunean aurkezpena egingo dute kultura etxean, batez ere, maparekin sortu diren zalantza guztiak argitzeko.

Mapa toponimikoa Ikermap izeneko enpresak egin du, Aramaioko Udalak adjudikatuta.



Luis Mari Azkargorta *Kanto*, libre

Luis Mari Azkargorta aramaiarra aske utzi zuten martitzenean (hilak 7). Martutenean zegoen. 1988a ezkerro izan da preño Arexolako Kanto baserriko semea. Aramaiorrek harrera egingo diote domekan (hilak 12). 17:30ean *Kanto*-ren jaiotetxetik irten, eta 18:00etan plazan batuko dira. Arrasatera joango dira gero, eta handik Bergarara, 19:00etan manifestazioa izango da-eta.

HERRITARRENHITZA/Rosa Mondragon • Kazetaria

Zientzia eta etika ez datoz bat

Dolly bildotsak hasi zuen klonazioaren bidea eta Wilmutek zuzendu zuen ikerlari ekipoak lortutako emaitzak zeresan ugari eman du 1997tik hona. Animaliekin ez ezik, pertsonekin ere klonazio saiakerak egiteko asmoa erakutsi dute ordutik hona Europako, Amerikako zein Asiako ikerlari askok.

Balantzaren beste aldean, berriz, elizak zuzendu eta elkarte askok bultzatu duten kontrako kanpaina dugu. Etika arrazoen argudioarekin klonazioa naturaren kontra datorrela adierazi dute. Bitartean, herrialde gehienetan dagoen legalitate hutsuneak

polemika eta kontraesana besterik ez dute potentziazten.

Gai horren inguruko azken berria abenduan bertan heldu zaigu. Ameriketako Estatu Batuetako sekta batek iragarri duenez, jadanik jaio da klonatutako lehen gizakia.

Orain, frogatzea geratzen zaie, eta ez da batere erraza, *Dolly* klonazio prozesu batez jaio zela oso eztabaidatua izan baitzen.

Kolaborazio honi jarritako izenburuarekin bat etorrita,



"Klonazioa naturaren kontra datorrela diote"

klonazioa zientzia da? Zientifikoki, klonazioan zelula heldua enbrioi bihurtzen da eta bizitza berri bat sortzen du. Horren ondorioz jaioko den umeak hasierako zeluladun gizakia- ren herentzia genetiko berbera izango du. Zientifikoki ere klonazioa-

ren bidez zuhaitz genealogikoa ikertzen da, animalien eta pertsonen arteko organo transplanteen aukerak ikertzen dira eta gaixotasunen osaketan eragin zuzena du. Horrela

esanda, badirudi nahiko abantaila dituela, ezta?

Bestalde, elizak eta elkarte eta erakunde batzuek klonazioa naturaz kontra datorrela argudiatzen dute eta lege aldetik dagoen hutsunea lehenbailehen betetzea eskatzen dute. Arrazoi horrek ere logikoa dirudi, bestela galde iezaiozu zure buruari: non dago galdu duen alaba klonatzea edo dirudunen esku egongo da soilik? Aukeratu ahal izango dugu gure umearen sexua, begietako kolorea, ile kolorea, eta abar?

Argi dago, zientzia eta etika ez datoz bat kasu honetan.

LABUR

Mendiko zenbait bidetan luiziak daude oraindik

Oraindik ere joan den abenduko euriteek eragindako luiziak daude Aramaion. Mendiko bideetan bakarrik daude, baina dezente handiak dira. Eta zenbait herritarrek inguruak garbitzeko eskaera egin diote Udalari. Hain zuzen ere, luizi handi bat Eskoriatzako mugatik 100 bat metrora dago. Eta beste bat Arrikoitin gora-ko bide baten. Udaletik adierazi digutenez, luizi horiek garbitzeaz gain, akaso harrizko horma ere egin beharko dute, gainerakoari eusteko. Edozelan ere, oraindik hori guztiori erabakitzeke dute.

TELEFONO JAKINGARRIAK

OSASUNA / LARRIALDIK

Osasun etxea (txandak).....	945 44 53 40
Botika.....	945 44 50 03
Udaletxea.....	945 44 50 16
Ertzaintza (Arrasate).....	943 79 71 99
Gurutze Gorria (Legutio).....	945 45 52 52
San Martin Eskola.....	945 44 50 04
Taxia eta autobusak.....	945 44 50 33
Udal kiroldegia.....	945 44 53 35
Postetxea.....	945 44 50 83
Zuiko Eskualdea.....	945 43 01 67
Suhiltzaileak (Zubillaga).....	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00	10:15**	
11:00	11:15	
12:00	12:15**	13:00
15:15	15:30	16:15
17:20	17:35	
18:30	18:45**	
20:30	20:45	21:05
21:10	21:25**	

GASTEIZ	ARAMAIO	ARRASATE
	07:50	08:05
08:20	09:00	09:15
	10:15*	10:30
	11:15	11:30
13:10	13:45	14:00
16:20	17:00	17:15
	17:35	17:50
	18:45*	19:00
19:30	20:10	20:25

OHARRA: izartxoan duten orduetan eskaeraren arabera zerbitzua eskaintzen dute; autobusa erabili gura duenak, bezperan deitu beharko du honako zenbaki honetara: 629 54 59 23. Bi izartxoan duten zerbitzuak auzoetara joateko dira.

OHARRAK

ODOL EMATEA

Arabako odol bankuko langileak Aramaion izango dira datorren eguaztenean, hilak 15, odola ateratzen. Betiko moduan, odol emateendako hitzordua ambulatorioan izango da, 16:00etatik 20:00etara.

ELURRA IRITSI DA

Urte berria iritsi da, eta urte berriarekin batera, urteko lehenengo elurteak ere bisitatu ditu Aramaio eta bazterrak. Martitzenean, adibidez, Orixol inguruak zurituta ikusi genituen; ez zuen elur askorik egin; bai, ordea, giroa dezente hozteko beste. Horrez gain, eta oraingo astearen amaiera alderako iragarritako eguraldi txarrari aurre egiteko, makinak (traktorea) eta bestelakoak gertu zituzten, badaezpada, Udaleko langileak. Dena dela, albiste hau idaztean oraindik ez genekien eguraldi eskas horren ondorioen berri.

ZINEMA


Domekan, *El bosque animado* emango dute; betiko moduan, 17:00etan izango da, kultura etxean.

GIZARTEA

Abian da adinduendako Imersoren Bainuetxe Programa

Urtarrilaren 21era arteko epea dute Aramaioko pertsona nagusiek Imersoren Bainuetxe Programan izena emateko. Euskal Autonomia Erkidegoko, Nafarroako, Errioxako, Galiziako, Extremadurako, Murtziako, Valentziako eta Balear Uharteetako zenbait bainuetxetan 15 eguneko egonaldiak aukeratu ditzakete programa horren arabera. Prezio aldetik, gainera, dezente merkeak dira egonaldi horiek. Besteak beste, bainuetxeetan medikuak azterketa egingo die pertsona nagusiei eta gero, mediku horrek esandakoaren arabera tratamendua ezarriko diete.

Bainuetxe Programaren barruan bi txanda daude. Orain, otsailetik abuztura arteko bidaiak emango dituzte, lehenengo txandakoak, alegia. Irailtik abendura arteko egonaldietarako eskaerak, berriz, maiatzaren 16ra arte egin ahal dira. Interesa duenak Aramaioko Udalera jo behar du.



BOTEPRONTOAN/ Nagore Artamendi · Udaleko idazkaria

“Herritarrei esango nieke orain arte moduan hartu-emanan izan dezatela Udalarekin”

Donostiatik etorri zaigu Udaletxerako idazkari berria: Nagore Artamendi. Gaztea da, baina dagoeneko esperientzia dezente du, bai ikasten, baita lanean ere. Besteak beste, kontatu digu Deustuko Unibertsitatean egin zituela Zuzenbide ikasketak eta azkeneko urtea Bordelen egin zuela, Erasmuseko beka bati esker. Lanean ere ez da atzean geratu:

Zelan iritsi zara Aramaiora? Ikasketak bukatzean, garbi nuen Zuzenbidearen barruan, gehienbat, Hirigintzako gaiak gustatzen zitzaizkidala. Master bat egin guran hasi nintzen; baina, aldi berean, Eusko Jaurlaritzarako beka eman zidaten, eta gauza biak batera egiten ibili nintzen. Masterra bukatu nuenean, praktikak egiteko aukera eman zidaten Usurbilgo udaletxean. Bi hilabeterako hartu ninduten, baina, iritsi eta berehala Hirigintzako teknikari moduan lana eman zidaten. Iaz, ekainean, bukatu nuen guztia, eta beste zerbaiten bila hasi nintzen. Gipuzkoako Abokatuen Elkargotik iritsi zitzaidan Aramaioko Udaleko eskaintzaren berri. Kontuan hartuta idazkari lanean, batik



“Idazkari lanean batik bat niri gustatzen zaizkidan gaiak izaten direla eta etorri nintzen”

bat, niri gustatzen zaizkidan gaiak izaten direla, aurkeztu egin nintzen. Epea bukatzean zegoela aurkeztu nintzen, eta ez nuen espero lortzerik, banekielako jende asko aurkeztuko zela. Baina aurkeztu, eta azkenean, lortu nuen.

Zein da lanpostuaren gainean izan duzun aurreneko inpresioa?

Administrazioan lehendik ere ibilita nengoenez, inpresioa neukanaren antzekoa da; hau da, badakit zelako funtzionamendua duen administrazioak. Edozelan ere, asko gustatu zait hemen orain arte egindako lana; lan zuzena da, bereziki, herri txikia delako.

Dena dela, oraindik galdu samar nabil; aurreko idazkariarekin konparatuz, lan egiteko beste modu bat daukat...

“Asko gustatu zait hemen orain arte egindako lana; lan zuzena da, bereziki, herri txikia delako”

KIROLA

Oporraldiaren ostean, berriro ere hasi dira areto futboleko Bañerakoak

Gabonetako oporraldiaren ostean, Bañera areto futbol taldeko jokalariek berriro ere eutsiko diete asteburuetakotako partiduei. Hain zuzen ere, hiru taldeek bihar, zapatua, jokatuko dute.

Horrela, Bañerako gazteek Aramaioko kiroldegian jokatuko dute, 11:30ean, El Pilar Marianistas taldearen kontra; kadete mailako mutilek, berriz, Gasteizen jokatuko dute, Jesus Obrero taldearen kontra, 11:00etan; eta kadete mailako neskek ere Gasteizen dute biharko hitzordua. 12:00etan jokatuko dute, Club Deportivo Aurrera taldearen kontra, Judimendin.

Areto futboleko hiru talde horiek joan den abenduaren azkenurreko astean jokatuko zituzten azkeneko partidukoak.

Horrez gainera, esan beharra dago Bañera kirol taldeak laster ekingo diola bazkideen kuotak eta txartelak berritzen. Abisatuko dute lehenago.

Eta Aramaio zer iruditu zaizu?

Ez nuen ezagutzen, sekula egon barik nengoan. Oso herri polita dela iruditu zait.

Ez zaizu txikia geratuko Donostiatik etorrita?

Gauza bat da lan egiteko lekua eta beste bat bizi izateko lekua: lan egiteko leku moduan ez zait txikia iruditu; bizi izateko leku moduan, berriz, oraindik gai hori lotu barik daukat, eta ez dakit zelan ibiliko naizen. Oraingoan, Arrasaten nago, baina oraindik ez dakit. Dena dela, ez litzaidake inportako. Kanpora bizi izatera joan izan naizenez, lekura ohitu behar izan naiz: txikia izan, handia izan, berdin dio. Ez zait inporta, tokatzen zaizuna egin behar da, eta lanak eskatzen badu...

Herritarrei zerbait esateko?

Orain arte moduan, Udalarekin hartu-emanan izan dezatela. Batik bat, gauzei irtenbidea emateko gaude gu hemen; azken baten, herritarrendako zerbitzua da. Ez dezatela etortzeko beldurrik izan. Eskatzea libre da, kontsultak egitea ere libre da... etor daitezela. Eta ahal dugun neurrian gauzei irtenbidea ematen ahaleginduko gara gu.